

**Talamdan sa
Mga Mensahe alang sa Full-time Training
sa Fall Term sa 2022**

**LINANGKOB NGA HISGOTANAN:
MAGKINABUHI DIHA SA REALIDAD SA LAWAS NI CRISTO
SA PAGKAT-ON KANG CRISTO MAINGON NGA NAA NI JESUS ANG REALIDAD**

Mensahe 14

**Magkinabuhi diha sa Realidad sa Lawas ni Cristo
sa Paghunahuna sa Usa ka Butang ug Pagkat-on sa Sekreto**

Basahong Kasulatan: Efe. 4:20-21; Fil. 2:2; 3:12-14; 4:6-8, 11-13

- I. Ang *usa ka butang* sa Filipos nagpasabot sa subjectibong pagkaila ug pagsinati kang Cristo; ang *usa ka butang* mao ang pagpursigir kang Cristo aron mabatonan Siya, makuptan Siya, ug mapanag-iya Siya—1:20-21; 2:5; 3:7-14; 4:13:**
- A. Aron makakinabuhi diha sa realidad sa Lawas ni Cristo, magpahimulos gyod ta ni Cristo sa paghigugma Kaniya sa kinahingpitan gyod, ug aron mahigugma Niya, luwason gyod ang atong mga hunahuna sa pagkatig-a (2 Cor. 3:14), pagkabuta (4:4), pagkamasupilon (10:4-5), ug pagkadaot (11:2-3) niini.
- B. Ipunting gyod nato ang atong panghunahuna sa labaw nga pagkamaayo sa pagkaila kang Cristo ug sa pagsinati ug pagpahimulos kang Cristo; ang pagpunting niini sa laing butang makapalahi natog hunahuna, ug tungod niana makamugnag mga panagbingkil sa atong taliwala; ang atong tumong mao ang kinahingpitang pagpahimulos kang Cristo ug kinahingpitang pagpakabaton Niya—1 Cor. 1:10; Fil. 3:8-9, 14; 4:2:
1. “Hingpita ninyo ang akong kalipay, nga maghunahuna unta mo sa samang butang, magbaton og samang paghigugma, madugtong sa kalag, maghunahuna sa ***usa ka butang***”—2:2.
 2. “Dili kay nabatonan na nako kini karon o nahingpit na ba ko, kondili nagpursigir ko, aron basin makakupot ko sa butang nga tungod niana gikuptan sab ko ni Cristo Jesus. Mga igsoon, wala nako isipa ang akong kaugalingon nga nakakupot na; apan ***usa ka butang*** ang akong gibuhat: Gikalimtan nako ang mga butang nga nangagi na ug gikab-ot ang mga butang nga naa sa unahan, nagpursigir ko sa tumong alang sa ganti nga niana gitawag ko sa Dios paingon sa itaas diha ni Cristo Jesus”—3:12-14 (lit.).
 3. “Marta, Marta, nabalaka ka ug nahasol sa daghang butang; apan ***usa ka butang*** ang kinahanglanon, kay gipili ni Maria ang maayong bahin, nga dili makuha gikan niya”—Luc. 10:41b-42.
 4. “***Usa ka butang*** ang gipangayo ko ni Jehova; / Nga tinguhaon ko: / Nga magpuyo ko sa balay ni Jehova / Sa tanang adlaw sa akong kinabuhi / Aron mosud-ong sa katahom ni Jehova, / Ug magpakisayod sa Iyang templo”—Sal. 27:4.
 5. “Duna Koy ***usa ka butang*** batok nimo, nga gibiyaan nimo ang imong unang gugma”—Bug. 2:4.
- C. Ang *usa ka butang*, ang bugtong-talagsaong butang, sa pahiuli sa Ginoo mao ang walay kataposang pamatigayon sa Dios nga si Cristo ang sentro ug uniberso—Col. 3:10-11:
1. Ang *usa ka butang* nga tingban gyod sa atong pagtagad, hatagag gibug-aton, ug ipangalagad diha sa pahiuli sa Ginoo mao ang walay kataposang pamatigayon sa Dios—1 Tim. 1:3-4.
 2. Ang sulod sa walay kataposang pamatigayon sa Dios mao si Cristo; sa pagkatinuod, si Cristo mismo sa hingpit nga pagpangalagad Niya sa tulo ka hugna mao ang diosnong pamatigayon (Juan 1:14; 1 Cor. 15:45b; Bug. 1:4; 3:1; 4:5; 5:6); tinguha sa Dios nga dunay putli ug bug-os gyong pagpahiuli sa persona ni Cristo (Col. 1:17b, 18b; 2 Cor. 12:2a; 2:10; 3:3).
- II. “Nakat-on na man ko nga makontento sa bisan unsay akong mahimutangan. Makamao sab ko magpakaubos, ug makamao ko magpakabuhong; sa tanang butang ug diha sa tanang butang nakat-onan na nako ang sekreto nga magpakabusog ug magpakagutom, nga magma-dagayaon ug maanaa sa kawalad-on. Makahimo ko sa tanang butang diha Niya nga nag-gahom nako”—Fil. 4:11b-13:**

- A. Ang pamulong *nakat-onan na nako ang sekreto* nagpakita nga naa na si Pablo sa bag-ong sitwasyon, bag-ong palibot; matag panahon nga ibutang ta sa bag-ong palibot, kat-onan gyod nato ang sekreto sa pagkinabuhi nianang palibota:
1. Ang *nakat-onan na nako ang sekreto* linetrang nagpasabot og “gipasugod na ko”; nagpasabot ang pasumbingay dinhi sa pagpaentrag tawo sa sekretong katilingban nga tinudloan sa panugdang mga prinsipyo niini.
 2. Sa nakabig na si Pablo ngadto ni Cristo, gipasulod siya ngadto ni Cristo ug sa Lawas ni Cristo; nakat-onan dayon niya ang sekreto sa paghimo kang Cristo nga iyang kinabuhi (Col. 3:4), sa pagkinabuhi kang Cristo (Fil. 1:21a), sa pagpadako kang Cristo (v. 20), sa pagpakabaton kang Cristo (3:8, 12), ug sa pagkinabuhi sa iglesiahanong kinabuhi (1:8, 19; 2:1-4, 19-20; 4:1-3).
- B. Mga tinun-an, mga magtutuon, ang mga magtutuo nga nagkat-on kang Cristo maingon nga naa ni Jesus ang realidad sa pagpagiya nila sa Espiritu ngadto sa tanang realidad sa aktwal nga kahimtang sa kinabuhi ni Jesus ingon sa nasulat sa upat ka Ebanghelyo, sa kinabuhi nga nagbuhat si Jesus sa tanan diha sa Dios, uban sa Dios, ug alang sa Dios; naa sa Iyang pagkinabuhi ang Dios, ug nausa Siya sa Dios—Juan 16:13; Efe. 4:20-21:
1. Natinun-an ang mga magsusunod ni Cristo pinaagi sa pagkinabuhi ni Cristo isip tawo dinhi sa yuta ingon nga sumbanan sa Dios-tawo—nagkinabuhi sa Dios sa pagdumili sa Iyang Kaugalingon diha sa Iyang pagka-tawo (Juan 5:19, 30), nag-usab sa ilang hunahuna kalabot sa tawo (Fil. 3:10; 1:21a).
 2. Kay gikinabuhi man ni Cristo ang Dios sa pagdumili Niya sa Iyang Kaugalingon diha sa Iyang pagka-tawo, “nakat-on Siya sa pagsugot tungod sa mga butang nga Iyang giantos” (Heb. 5:8), “nagmasinugtananon bisan ngadto sa kamatayon, ug kana sa kamatayon sa krus” (Fil. 2:8).
 3. Makat-on ta ni Cristo (Mat. 11:29) sumala sa Iyang panig-ingnan, dili pinaagi sa natural natong kinabuhi kondili sa Iyang kinabuhi diha sa pagkabanhaw, nga kinabuhi sa pagkamasinugtananon; ang tinun-an tawo nga nagkinabuhi sa diosnong kinabuhi diha sa iyang tawhanong kinabuhi.
 4. “Naa ko sa pahiuli naniid giunsa pagbuhat ni Brother Watchman Nee sa napulog walo ka tuig. Tanang napanid-an nako niya nahimong mga butang nga naghimo nakong tinun-an” (*The Collected Works of Witness Lee, 1994-1997*, vol. 5, “The Vital Groups,” p. 76).
 5. Ingon nga mga tinun-an sa Ginoo, mga magtutuon Niya, sige tang gibansay Niya isip grasya sa Dios, nga nagpakita sab nato ingon nga “kalulot ug gugma sa atong Manluluwas nga Dios sa tawo”; kini ang grasya nga “nagbansay nato nga, sa pagdumili sa pagkadili-diosnon ug kalibotanong mga kailibgon, ligdong ug matarong ug diosnon gyod tang magkinabuhi karong panahona, nga nagpaabot sa bulahang paglaom, bisan sa pagpadayag sa himaya sa atong dakong Dios ug Manluluwas, nga si Jesucristo”—Tito 2:11-13; 3:4.
 6. Kay mga tinun-an man sa Ginoo ang mga sister sa iglesiahanong kinabuhi, mausa gyod unta sa Ginoo ang mas magulang nga mga sister aron bansayon nila ang batan-ong mga sister “sa paghigugma sa ilang bana, sa paghigugma sa ilang mga anak, magmatin-aw og hunahuna, putli, manggibuhaton sa panimalay, maayo, nagpasakop sa kaugalingon nilang bana, aron dili mapasipad-an ang pulong sa Dios”—2:3-5.
 7. Ingon nga mga tinun-an sa Ginoo, mosugot gyod ta sa pulong sa Ginoo nga “lakaw ug tun-i kon unsay buot ipasabot niini”—tinguha sa Dios nga maluoy sa makaluluoyng mga makasasala, mao nga gusto Siya nga maluoy ta sa paghigugma nato sa uban—Mat. 9:12-13; Miq. 6:6-8; Mar. 12:33.
- C. Mga tawo gyod unta ta nga nanghatag, nag-ampo, ug nagpuasa “sa tago” (Mat. 6:4, 6, 18) aron mausa ta sa “Dios nga nagtago sa Iyang Kaugalingon” (Isa. 45:15), nga nagtagad sa presensya sa Amahan nga “nakakita sa tago” (Mat. 6:18):
1. Magpabilin gyod ta sa atong espiritu nga “kaugalingong lawak” nato (v. 6) ug ang “tinagong dapit sa Labing Taas Uyamot” (Sal. 91:1) aron masinati nato si Cristo nga atong kinabuhi sa pagkamasinugtananon.
 2. Motago gyod ta ni Cristo sa paghangyo Kaniya nga tagoan ta diha sa atong espiritu, nga mao “ang tagoanan sa [Iyang] presensya” (31:20); naa ngani ta sa atong espiritu, naa ta ni Cristo,

nga Kaniya walay bisan unsa si Satanas nga magbubuot sa kalibotan—walay luna, walay higa-
yon, walay paglaom, ug walay posibilidad sa bisan unsang butang (Juan 14:30).

D. Ang sekreto sa Filipos 4 mao ang pagbuhat sa tanang butang diha ni Cristo nga maoy naggahom nato—v. 13; *Mga Alawiton*, #564:

1. Tawo si Pablo nga naa ni Cristo (2 Cor. 12:2), ug nagtinguha siya nga makaplagan sa uban diha ni Cristo; gipahayag niya sa Filipos 4:13 nga makahimo siya sa tanang butang diha Niya, ni Cristo mismo nga naggahom niya; malangkobon-sa-tanan ug panghinapos nga pamulong kini sa iyang pagsinati ni Cristo; kini ang pikas nga bahin sa pulong sa Ginoo sa Juan 15:5 kalabot sa organicong relasyon nato Kaniya, “Bulag Kanako wala moy arang mahimo.”
2. Hingpit gyong naa si Pablo kanhi sa Judiohanong relihiyon ubos sa kasugoan ug kanunayng nakaplagan sa uban diha sa kasugoan, apan sa pagkakabig niya nabalhin siya gikan sa kasugoan ug sa kanhing relihiyon niya ngadto ni Cristo ug nahimong “tawo nga naa ni Cristo”—2 Cor. 12:2.
3. Karon naglaom siya nga makaplagan diha ni Cristo sa tanang naniid niya; nagpakita kini nga nagtinguha siya nga mahumol diha ni Cristo ug masuropan Niya ang tibuok niyang pagkatawo aron makaplagan siya sa tanang naniid niya nga hingpit gyod siyang naa ni Cristo; sa diha lang makaplagan ta diha ni Cristo nga mapadayag ug mapadako Siya—Fil. 3:9a; 1:20.
4. Sa usa ka bahin, tungod sa paggahom ni Cristo makakinabuhi ta sa kinabuhing nakontento (4:11-12); sa laing bahin, tungod sa paggahom ni Cristo mahimo tang tinuod, halangdon, matarong, pulti, hiligugmaon, ug dinayeg (v. 8).
5. Ang pulong ni Pablo kalabot ni Cristo nga maoy naggahom labi gyong ikaaplikar sa paggahom ni Cristo kanato aron magkinabuhi ta Niya ingon nga tawhanong maayong kagawian nato ug sa ingon niana mapadako Siya sa walay kinutobang pagkadako Niya; ang pagkinabuhi ning maayong mga kagawian labi pa gyod kalisod kaysa pagbuhat og Cristohanong buhat.

E. Ang praktikal nga paagi sa pagbuhat sa tanang butang diha ni Cristo nga maoy naggahom nato makita sa Filipos 4:6-7: “Ayaw kabalaka sa bisan unsa, hinunoa sa tanang butang, ipahibalo lang pinaagi sa pag-ampo ug pagpangamuyo uban sa pagpasalamat, ang inyong mga hangyo sa Dios; ug ang kalinaw sa Dios, nga labaw sa tanang pagpanabot sa tawo, magbantay sa inyong kasingkasing ug sa inyong mga hunahuna diha ni Cristo Jesus”:

1. Si Cristo mismo ang kalinaw sa Dios, nga labaw sa tanang pagpanabot sa tawo—Isa. 9:6; Juan 14:27; Luc. 7:50; Rom. 3:17; 5:1; 8:6; 15:13; 16:20.
2. Nagpasabot ang *sa Dios* og lihok paingon sa, sa kahulogan sa buhing pagkahiusa ug pakigsultianay, nga nagpasabot og pakig-ambitay; busa, ang kahulogan sa *sa Dios* dinhi mao ang “naa sa pakig-ambitay sa Dios”—Fil. 4:6.
3. Ang resulta sa pagpakig-ambitay nato sa Dios diha sa pag-ampo mao nga mapahimuslan nato ang Iyang kalinaw; sa pagkatinuod ang kalinaw sa Dios mao ang Dios nga kalinaw (v. 9) nga gipatuhop kanato sa pagpakig-ambitay nato Kaniya sa pag-ampo, isip pangontra sa mga kasamok ug tambal-igsumpo sa kabalaka (Juan 16:33).
4. Nagpatrolya ang Dios sa kalinaw atubangan sa atong kasingkasing ug mga hunahuna diha ni Cristo, nagpakalma ug naghimo natong malinawon (itandi sa Isa. 30:15a); kon buot ta nga walay kabalaka ang atong kinabuhi, kinahanglan makaamgo ta nga tanang sirkumstansya nato, maayo ba o daotan, gitudlo sa Dios kanato aron mosilbe nato sa pagtuman sa atong palad nga makabaton ni Cristo, magkinabuhi ni Cristo, ug magpadako ni Cristo (Rom. 8:28-30; Mat. 10:29-31; 2 Cor. 4:15-18).

F. Ang pagkat-on sa sekreto sa pagbuhat sa tanang butang diha ni Cristo nga maoy naggahom “pag-ampo man aron makig-ambitay ni Jesus,” nga atong Hari, atong Ginoo, atong Ulo, ug atong Bana (*Mga Alawiton*, #784); ang pag-among nikontak sa Dios hinimo sa mga pulong nga kinasingkasing gyong gisulti:

1. Naa tingali ta sa sitwasyon sa kaguol, kasubo, ug kahigawad; dad-on gyod nato sa Ginoo ang atong mga problema ug sultian Siya kalabot niini; Siya ang labing maayong tigpaminaw; nasayod Siya sa atong pagbati, ug nisimpatiya Siya sa atong kasingkasing; makalipay ug makatabang Siya nato.
2. Makaamgo gyod unta ta nga maayo ngani kaayo ang pakigsultianay nato sa Ginoo ug ibubo nato ang atong kasingkasing Kaniya, mas masuod pa gyod ta Niya, ug labi pa tang makaila Niya; ang

- suod nga pakigkontak nato Niya ning mga panahona gatosan ka pilo pa kamaayo kaysa ordinar-yong pakig-ambitay nato Kaniya; pinaagi man ning mga pagkontaka nga motubo ta sa kina-buhi—Sal. 62:6-8; 56:8; itandi sa 1 Sam. 1:15.
3. Kon wala pa sukad makapatulo og mga luha ang tawo atubangan sa Ginoo, wala pa sukad ma-kasulti sa Ginoo sa iyang kalipay o kasubo, ug wala pa sukad makapakigsultianay sa Ginoo kalabot sa pribadong mga butang niya, wala pa siya sukad makapakig-ambitay sa Ginoo sa suod gyod, ug wala pa siya sukad lalom nga makaila sa Ginoo; mas masuod lang sa Ginoo ang tawo sa pagsulti niya Kaniya sa tanan.
 4. Masimpatiyahon Siya sa tanang problema nato; andam nga mopas-an ang atong Ginoo sa ta-nang kabalaka nato, ug malipay Siyang maminaw sa atong gisulti; aron makapahimulos Niya nga buhing tubig sa kinabuhi, mosulti gyod ta Niya nga espirituhanong dakong bato nato—Num. 20:8; 1 Cor. 10:4; Exo. 17:6; *Mga Alawiton*, #248.
 5. Niingon ang ulohan sa Salmo 102 nga, “Pag-ampo sa tawong gisakit, sa dihang naluya siya ug gibubo ang iyang gimulo sa atubangan ni Jehova”; moreklamo tingali ta sa Dios, apan ang atong pagreklamo mao tingali ang labing maayong pag-ampo, ang pag-ampong labing makapa-himuot sa Dios; samtang nireklamo ta, nagkalipay ang Dios kay gipabuhat man Niya ang ta-nang butang alang sa ikaayo aron masama ta sa dagway sa Iyang Anak—Rom. 8:28-29.
 6. Rekord ang Salmo 73 sa matinuorong pag-ampo sa matinguhaong salmista nga hapit na ma-pandol tungod sa kaugalingon niyang pag-antos ug sa pag-uswag sa daotan; giisip niya nga kawang ang pagputli niya sa iyang kasingkasing tungod kay imbis magpahimulos og materyal nga pag-uswag, gihampak man hinuon siya sa tibuok adlaw ug gikastigo matag butang—vv. 12-16:
 - a. Nakaplagan sa salmista didto sa balaang puluy-anan sa Dios ang sulbad sa kalibog niya kalabot sa pagkamauswagon sa mga daotan; una, naa sa atong espiritu ang balaang puluy-anan sa Dios, ang gipuy-an Niya (Efe. 2:22), ug ikaduha, kini ang iglesia (1 Tim. 3:15); ang pagsulod nato sa balaang puluy-anan sa Dios pagliso man nato sa atong espiritu ug pag-tambong sa mga tigom sa iglesia ug sa mga tigom sa pagpangalagad; diha sa atong espiritu ug sa iglesia mapadaygan ta sa disonong pinadayag ug makabaton og katin-awan sa tanan natong problema.
 - b. Pinaagi sa matinuorong pakigsultianay niya sa Ginoo ug sa pagsulod niya sa balaang puluy-anan sa Dios, sa kapulihay gihayagan sa Ginoo ang tawong nagtinguha Niya hangtod nakaingon siya Niya nga, “Kinsa may ako sa langit kondili Ikaw ra / Ug wala koy laing gitinguha dinhi sa yuta gawas Nimo. / Naluya ang akong unod ug ang akong kasingkasing, / Apan ang Dios mao ang dakong bato sa akong kasingkasing ug ang akong bahin hangtod sa hangtod”—Sal. 73:25-26.
 - c. Ang tuyo sa Dios sa mga nagtinguha Niya mao nga mabatonan nila ang Dios, makaplagan nila ang tanan diha Niya, ug dili sila masimang gikan sa bug-os nga pagpahimulos Kaniya; ang kinataposang tinguha sa Dios sa pamatigayon Niya mao nga makahigayon Siya sa pagtukod pag-usab sa tagsatagsa kanato sa Dios mismo, aron mahimo tang Dios-tawo, nga sama sa Dios sa Iyang kinabuhi ug kinaiya apan dili sa ranggo Niya sa pagka-Dios, aron magpadayag sa Dios ug mahimaya Siya—Isa. 43:7; 1 Cor. 10:31; 6:20; 1 Ped. 4:11.